

Prost Neijohr ...

hott omm letzde Sunndaach moin Kummbeer Schorsch ins Telefon gekrische, Prost Neijohr unn bleibt allminonner gesund im neie Johr.

Danke, moin Liewer, habb isch nitt gons su laut ze Antwort gewwe, doin Wunsch ferrs neie Johr iss dobbeld unn dessdeweese besonners nitzlich.

De Schorsch hott enn Aachebligg gebraucht bisser gesaad hott: Wie dobbeld?

Ei Schorsch, weilde schunn onn Neijohr oogerufe unn genau dess sellwe gesaad host.

Doo isser awwer baff gewese: Werklisch?

Isch habb ins Telefon gegrinst. Ja, werklisch, Schorsch. Iss ebbes, dassde e bissi dorscheonner bist?

Doo seeder: Werklisch nitt. Odder doch, Honnes. Die gons Geschicht mett dere Corona gieht merr allsfort im Kobb erum. Nitt dass isch Ängst hädd misch oozestegge, naa, weil dess Kättche unn isch sinn aach iwwer die Feierdaach alloo gebliwwe, koo Kinner, koo Enkel, nor mir zwaa.

Isch saach: Schorsch, genau su hawwe mir dess aach gemacht. Dess muss alles emol gieh, moonsde nitt?

De Schorsch druff: Ei ja. Awwer wenn isch im Fernseh sehe due, wie die Leit mett ihre Audos korrz vorm Feldberrsch umgeleid werrn, nor weil su vill vunn dene all uff oomol in de Schnee fahrn wolle, dess iss doch e gruß Unvernunft, odder? Aach weil donn su vill Mensche unnerweeschs sinn, doo hawwe se sich doch schnell oogesteggd.

Isch habb e bissi noochgedenkd. Schorsch, mir sinn ahle Leit, hawwe e Haus unn enn Gadde, in dene mir uns beweese kenne. Awwer denk emol droo, ess dut enn Haufe junge Leit gewwe, die ihre Kinner mol e bissi Schnee zeiche wolle unn ferrs Rodele de Schlidde debeihawwe. Vor alle Dinge wolle die emol eraus aus ihre Wohnung, long genuch hawwe se mett de Kinner ‚Mensch ärjer disch nitt gespilld‘, die Fraa muss koche unn doch duts koom su rischdisch schmegge, weil aach immer su e bissi Krach in de Wohnstubb iss. Also saach isch emol su, dess kann merr verstieh, aach weil joo immer gesaad werdd, dass drauße im Freie dess Risiko meddem Oostegge nitt su gruß iss.

Doo moont de Schorsch: No ja, dess iss joo aach dene ihr Sach. Honnes, ebbes onnersders: Dut ihr zwaa eich impfe losse mett dem neie Impfstoff?

Isch gebb ze Antwort: Ja, Schorsch, mir wolle uns impfe losse. Isch glaab joo nitt, dass dess ohne Komplikatione onn oom vorbeigiehd, awwer die Fraa unn isch hawwe uns im letzde Herbst wie aach in de John devor geesche die Gripp impfe losse unn doodenooch nix gehabbd, also moone merr, dess Corona-Impfe deede mir aach verkrafte.

Doo seet de Schorsch: Waaßde was? Donn dut ihr eich emol impfe losse unn dut uns donn verzähle, wies eisch gonge iss, unn wens nitt schlimm gewese iss, donn giehn mir aach. Machs gut.

Eiern Honnes

der soine Leser e gesund nei Johr winsche dut.